

道元卷之二百二十一

<p> 未入患家之先，依此存变为妙。先须凝定，叩齿，念净天地咒三遍，存太虚寥廓，四炁朗清。以次念金光咒三遍。存天门金光万道，仰面吸金光，吹布一身。存金光洞焕，风伯雨师，雷公电母，狂风骤雨，霹雳交轰，前光后暗，雷神将帅，前后拥护，行如狂风，坐如鼎石。到病家坐了，茶至，接下在手，吹炁一口，心存雷火烧去鬼毛鬼炁，然后方食。但是一应饮食。皆宜存变，然后食之。用洁净茱萸为之，做成小船亦可。先用启告祖师帅将，祝白事意，请降恩命变化外，以净水嚩洒神盘。咒曰：吾今上奉祖师旨命，造起千眼神盘。造起东路神盘，造起南路神盘，造起西路神盘，造起北路神盘，造起中路神盘。存五路神盘悉备，再以水嚩之。向来建造神盘已获整备，谨请五路神光，照开千眼神盘。谨勅东路毫光速起，谨勅南路毫光速起，谨勅西路毫光速起，谨勅北路毫光速起，谨勅中路毫光速起。以合明天帝日五字，从卯午酉子中剔向四方。存五路毫光调焕。向来开发五路毫光已行完整，请起神盘，前赴患身某人病房之中，装送时行瘴气，遣发瘟部威神，送入天津，返归空界。庶俾患身安愈，家道清宁。瘟风变作祥风，沴气翻成和气。一如玄科律令，急急奉行。却抬神盘赴病房中，就作用起水，存水泛涨泛起。神盘直入房中，放下于患人床前。神盘内用香一炉，灯一盏，法师同信人捻香一炷，毕，即叩齿三通，扬声念：信香一爇，云布十方。叩齿三通，流光万里。急准神霄玉清真王长生大帝律令。谨伸关白大符都天总管金容元帅，只今准奉帝命，谨退见患某身前后今年奉符行病一切威神，三十六候神君，七十二候神王，十二年王，十二月将神王，二十四炁神王，主瘟圣公，监瘟圣母，布炁大神，发汗大神，押瘟太尉，时瘟炁候白虎王神，邪巫枉死，阵亡妖怪，伏尸故炁，像部庙神，云中白虎，丧门吊客，黄泉急脚，为妖作祸一切神祇，隔茶隔饭传梦送怪一切鬼神，春行病神王，夏行病神王，秋行病神王，冬行病神王，蛮喉瘟，鲁子瘟，天中蝗蜚，地中蝗蜚，幽微黶淡蝗蜚，黄长脚，黄阔口，黄老精，黄恨客，黄房室女，黄伯娇男，黄伯娇女，

又及泻痢伤寒头疼寒热之鬼，一切为殃造祸神司，府县城隍，本祭神祇，尽皆请上千眼神盘。今有信人某，伏为见患某，自於今月某日感受病苦，饮食少思，医疗罔效，日久未安，切恐命限星辰，舍次岁曜加临，近凭卜课，云是瘟疫流殃，邪神为祸，备以千眼神盘，敬伸礼送。谨就门首，特备粢盛钱马酒礼之仪，普伸酌饯。伏请神威收拾时行瘴炁，卷藏毒药包箱，赦放罪殃，宽疏病证，咸体好生之德，各生欢悦之心，请上神舟，解绳放缆。务俾在患某人刻自今晚回送之后，精神清爽，病患立痊，更勿稽迟，有干玄律。一如帝令，火急奉行。兆嚙水一口，双手起海水诀，送神盘出门首酌饯，却以两手握五黑诀，存变乾河漏海，前光后暗。闭炁默念：天蒙蒙，地蒙蒙，人蒙蒙，鬼蒙蒙。天黑黑，地黑黑，人黑黑，鬼黑黑，天断头，地断头，人断头，鬼断头，天沉沉，地沉沉，人沉沉，鬼沉沉，大湖沉沉，小湖沉沉，，天沉，地沉。万里狂风吹塞鬼眼，万里黑风障断鬼路。人无寻影，鬼无寻踪。十道都关，九道都绝。急急如律令。存想患家房户尽为黑气所罩，密令人推闭门户，前光后暗，悉无所见。却就门首祭设，念云：太上立教，利济为先。凡庶投诚，熏香是首。谨运真香，皈命启请洞渊三昧天尊，天符令帝，都天元帅，六臂明王，和瘟教主匡阜静明真人，劝善明觉大师，泗泛大圣，表药主事，主瘟圣公，监瘟圣母，布炁大神，押瘟太尉，五方行瘟圣者，十二年王，十二月将；三十六神君，七十二候圣众雌雄白虎神王，船头大王，船尾小王，引神土地，后土社令神祇，城隍，本祭庙神，傩部神祇，本境之内，绝户枉死，山川岩穴精灵妖怪，伏尸故炁，依草附木并患人身前后传梦送怪、隔茶隔饭、为殃造祸、代形替厄一切神威，伏望来临香座，歆享凡仪。以令辄备清觞，用陈上献。伏闻大圣奉天符而行令，本是化人，小民敬露个以求怜，从而徼福。象管绘成新圣像，龙舟飞动现真龙。赫赫有灵，洋洋来格。手不持於桶杓，腰不挂於葫芦。放下兰桡，来吸泗洲之水；收回药柜，妙融五气之春。谅祭威灵，特旌忱禧。无任至恭，酒陈初献。伏以天有显道，本福善而祸淫；人无常心，每顺邪而弃正。既昧操修之理，莫逃糾察之司。自外化钧，动生魔障。善芽未露，非慈风所可嘘生，业垢尤深，必障雨乃

能清静。畀之患苦，将以安痊。念大道之至仁，省微躯之多过。噬脐无及，顿首知归。爰净扫於衡门，敬冒陈於菲供。所冀赦愆而有过，庶能解祸以为祥。合掌动慈容，记江头之好语；举杯壮行色，听水手之欢呼。无任至恭，酒陈二献。伏以化化生生，妙一机而不已，善善恶恶，赴诸物之自移。神之何心，人胡不觉。切念某爱河流荡，火宅忧煎。颠倒梦想之谓何，杀盗淫贪之自纵。言尤多於口过，罪每逐於心生。识无边无量之愆，叩大慈大悲之圣。卢医匡阜，返危脉以向安；地煞天符，转慈风而去病。巡海夜叉开海道，翻风使者息风波。河伯於此解维，江神从而转舵。免夫小子，赦平生不善之心：告诸大夫，领终席散忧之酌。无任至恭，酒陈三献。向来三献，已遂周圆。以今奉为某自今某月某日以来感受病证，至今未痊，敬伸回送，望赐平安。讽诵，用资神化。讳经。回向。向来讽诵，已谐周竟，所有钱旛磨马，用凭火化，上奉众神。以今某伏为某自今回送之后，用祈病患立安，年龄延永。伏以天作孽犹可违，深沐恩慈而尽释；舟弗济臭厥载，悉收疫毒以俱安。一筵之香酒既终，十幅之蒲帆不住。惟愿天符圣众，咸依明觉之法，言瘟部诸神，亟奉洞渊之勅旨。拾起葫芦药杖，收回羽扇汤瓢。大家洗脚上船，各自小心解缆。座左座右，皆曰儿郎，船尾船头俦非圣众。啖声击楫，听语句之非常；扬手鸣锣，睹容颜之难比。旗掣波心之电，鼓喧水面之雷，黄帽郎厉声后唱，白旗子奉命前驱。自然有迎棹之鸦，不必听桅樯之燕。画船载取瘟灾去，纤尔无留，神鼓催将福禄来，欣然有喜。在在之江山护送，方方之里社饯行。目断一时，恭伸四句：江头画鼓响冬冬，才挂高帆遇便风。吹送神船何处去，直归三岛十洲中。化钱。嚥水一口，双手起海水诀送了。就便心存天地昏黑，默念天蒙蒙咒，双手五黑诀，用湛遮子乾河漏海，坛场更变，寂无遗响矣。先从师帅前炷香，默存自己身神大威大猛，精神雄烈，奋怒杀伐。风伯雨师，雷公电母，狂风骤雨，霹雳交轰前光后暗，乾河漏海，雷神帅将先拥后随。咒曰：天猷天猷，猛烈诸侯。上佐北极，下临九州。身披金甲，手执戈矛。眼如掣电，爪似金钩。逢妖寸斩，遇鬼擒收。顺鬼不斩，逆鬼截头。上帝勅下，不得停留。急急如律令。咒水一口，入房门。咒

曰：都天大雷公，霹雳震虚空。精兵三十万，严驾此坛中。下鬼为狂暴，威令辄不容。摄赴魁罡下，化为清静风。急急准元始雷王律令。

咒水一口，近病人身。咒曰：太阴化生，水位之精。虚危上应，龟蛇合形。周行，威摄万灵。无幽不察，无愿不成。劫终劫始，剪伐魔精。救护群品，家国安宁。数终末甲，妖氛流行。上帝有勅，吾固降临。蒞扬正教，荡邪辟兵。化育黎庶，叶赞中兴。敢有小鬼，欲来现形。吾目一视，五岳摧倾。急急如律令。

嚥水一口，使扇左右。手掐卯文，退下，见患某人身前身后房中内外，春行病神王，夏行病神王，秋行病神王，冬行病神王，时瘟瘴气，庙神土地，丧车白虎，邪巫枉死，先亲复连，秃头和尚，矮子陀头，变影生形传梦送怪，隔茶隔饭、为寒为热一切鬼神，摄归外道而去。


吹炁一口，用五黑诀，存乾河漏海，仍用沈遮。三收，皆如此同。如发大热病泻痢之证，则用此后段。

春夏秋冬行病神王，黄长脚，黄阔口，黄老精，黄皇春香，黄皇室女，黄伯娇男，黄伯娇女，黄限客，天中蝗蜺，地中蝗蜺，幽微难淡蝗蜺，为寒为热疼痛蝗蜺，是名伤寒头疼泻痢之鬼，摄归外道而去。

左手结斗印，指定患人眉心，一炁急念：北斗九辰，中天大神。上朝金阙，下覆昆仑。调理纲纪，统制乾坤。大魁贪狼，巨门禄存。文曲廉贞，武曲破军。高上玉皇，紫微帝君。大周天界，细入微尘。何灾不灭，何福不臻。元皇正炁，来合我身。天罡所指，昼夜常轮。俗居小人，好道求灵。愿见尊仪，永保长生。三台虚精，六淳曲生。生我养我，护我身形。□□□□□□。急急如太上北斗真君律令勅。

默念斗咒，关闭一身气息，尽力取斗炁吹。再用大阴阳斗印，默念关闭，运天罡炁，咒：唵吽 嚩咤哩□诃。尽力取炁吹。冷取红炁，热取黑炁。道香一炷，十方肃清。法鼓三通，万神咸集。谨运真香，告召正一风火灵官马元帅，正一龙虎玄坛赵元帅，地司太岁尊神殷元帅，地祇昭武上将温元帅，朗灵诚魔关元帅，三五铁面豁落猛吏灵官王元帅，各部雷神，雷公电母，风伯雨师，雷霆诸司，院府官君将吏，一切神祇，速为某人身前身后房中内外驱处邪妖扫除精怪，解释愆非咒诅，奠安土府诸神。务要某人见患即安，寿年延永，神清气爽。语正言真。身有光明，魔无干犯。应有一

切邪怪不伏剿除，仰烦雷神照依吾咒，即便诛殛断绝施行。吾有神咒，谨为诵持。火帝降恶丑，覃恩出上清。九天排队仗，五岳列班迎。万里风烟息，千山草木平。云头过北海，雨脚散南溟。黑煞於中禁，天蓬降御营。灵官持玉印，太乙捧金晶。左阵骑朱虎，先锋跨大鲸。电光飞猛火。雷鼓振天廷。号令传三将，祛除用六丁。素黄齐豁落，童子尽开明。地网周回布，天罗盖匝并。火轮红焰起，雨过碧烟生。摆撼乾坤动，飞腾宇宙惊。气吞苍海竭，力拔太山崩。虎应庚辛白，龙随甲乙青。下鬼非强崇，何劳共战争。房中令寂静，万鬼自逃形。急急如上帝律令勅。 嚥水一口。 仍烦帅将为见患某苏通血脉，调治病源，务要所患立安，寿年延永。谨勅某身中五体真官，五脏六腑，三百六十形影，一万二千精光，左三魂右七魄，皮肤九窍，三百六十骨节，经络荣卫，上至泥丸，下至精气神，受吾神之后，形同天地受灵相，三万六千神守真。非祸不侵无障碍，七魄安宁神宇清。五脏六腑除邪害，五星六曜顺照临。神水一嚥消万厄，长生久视得安宁。急急如长生大帝律令。 嚥水一口。 出病人房门，默存将帅守护患人，剿戮邪怪。仍存将鼻跟内进出万丈金光雷火道炁，罩遮患人身体，屋宇内外，合家人眷□畜、俱已覆护。回至患家福神前，讽诵仙经。回向。 适伸启白福神，一切神祇，本部雷神官众，和送瘟司、退散病源，驱除邪怪剿戮妖魔，安舒土府，解释愆非，俾令见患即安，家门清吉，人眷和平。凡在光中，全叨默佑。稽首皈依，志心称念：福生无量天尊，不可思议功德。



[下载本文pdf文件](/pdf/2099-道元卷之二百二十一.pdf)